

2 PITA

Pita siya ta yokwowa iikamim naingwo tɔbmiiyim simiiram swoki wɔnkikin. Siya hɔriiyar naingwokin siya wɔ kimimin tani ti nu iirin wɔ sipi haiburgigi mɔ siya ta siir yaiya nikopkaigiyaana saiir asi boɔnkikin iikamim naingwo tɔbmiiyim simiir kɔnsiis haiginuwwam. Siya simiirin ti hɔnɔna boɔnkikin, warɔ kamim niksisaeyim simiir yayim simiiram kipi naingwo tɔbmii. Siya simiirin ti profet niksisaeyim simiirsi boɔnɔnkwokwokikin. Siya simiirin mɔn boɔnkikin, sima simiir naingwo tɔbmii airin sibgu donkworinu dimusi rani, Jisis siya wa tiri diminim siya boɔnim mɔ siya wɔ sipi swoki iti. Iriig.

Yokwo kwisaka aeya Pita siya wɔnkiya

¹ Kara Saimon Pitakin, inkamin whisarii mɔi pɔrimiriyyin Jisis Kraiis siirim, kariirin siyar nikmwɔn okwo haiginuugin siir yai imiir boɔnmɔmauwwam. Kara ta yokwowa iikamim yipiki simiir naingwo tɔbmiiya kɔrimiir hɔriinan komii nwowa mɔ yipiki ti yai kirie kibi kibiyim sim wakaeyoknam yipiki wɔ whiekak kɔrimiirar whɔnkinsiis haiginuwi kɔmiir wɔnkika. Dimusi rani, Adi Komii siirsika kɔrimiir dimin biyeyim Jisis Kraiis siya haiyoprindiyumuigikim mɔ kɔrimiirin ini rɔirmiya siyar ywowaiginuukiyim mɔ ini dimin whirki kimbu karamaeyar ywowim mɔ ti hɔriinan siyɔu iirsi nanmaiwarkainakin whiekak kɔrimiirin. ² Mɔ kara ha naingwowi, Adi Komii siya mɔ Jisis Kraiis sowa hauwi kɔmiirin,

naingwobumbu mi nongwomamaɔr ae wi nhami nhami hauu rani. Mi kɔmiir Adi Komiiyin mi Biyan Inkam Komii ikin Jisis Kraiis sowiir kirieni yipiki kima sibgu inokninkinim. Iriig.

Adi Komii siya bɔdi yimbinin kɔma siirgisiirgim

³ Adi Komii yipiki kirie komiigakin, kɔmiir bɔdi hauuwim dimin taemin whiekakim kɔmiir whinkinsiis haiginuwim siirim sibgu naingwo tibmiiyim. Dimusi rani, siya nanaakninkii haiginugin kɔmiirin mi kɔma Kraiis siir asi ninokninkini, yipiki biya kɔmiir nimbiniin siir dimin miyikim simiir haiyim mi kwoin miyikin dimin whirki kimbu karamae nwowin mi wi saikar waiyayokiyokikaeyami. ⁴ Ti hiriinan siyiuin siya bɔdi hauuwim kɔmiirin siir dimin kirie miyik miyikim biya siya nimbiniin kɔmiir mi ta hiriinan saiirsika mi tariinanin wim kima ti dimin taeminim simiir kirieya saiirin wim kima wa haiburgigi, ti dimin taemin biyeyim iikamim nuanim sima tiriyim simiirin. Mi ta hiriinan saiirsika mi kima wi siir dimin miyik imiir haii mi kima wi Adi Komii siir hiriinan nwowi. ⁵ Mi ti hiriinan siyiuin, kima kmiir naingwo tibmiiya saiirin sibgu sibgu kisop diriraerar sibgu nwowam. Mi kira ti hiriinan tiri saiirin mi wi miinan nhami nhami kipi mirii Adi Komii siir yayim yipiki warɔ kmiir kwoinaw nwokaiyim biya kima niki aingwo tibmiiyim simiir swoki inomokninkinamin. ⁶ Mi iriipi hiriinan, siya kima ti hiriinan tiri, mi kmiir kwoin imiirar kintimtinuna mi ta hiriinan saiirsika kima wi nikwokrimkrip rani mi wi dimin whirki kimbu rani mi ti iiyim dimin taemin

biyieki nimbiamyi mi wi mini hanin nwoki miriirim sibgu nokworinukripkaiyam. Mi wi maigimaiga hiriayar nwoki okripkaiyim Adi Komii siirgisiir siyiuin wa kimiir waraur nwowin siiram. ⁷ Mi iriipi hiriinan, kima ti hiriinan tiri mi kima wi kimiir nomiiyauim simiiram naingwokwonanaeiya mi simaka nomboin ii aeiya wi sair diisimauu simiirin. ⁸ Mi ti hiriinan diminim kimiir kwoin nwokaiyim, yim ini yinkinukikaiyim mi sima wi kimiir whinkinsiisi mi hiriinana sairsika kimiir kwoinim wi ningi ninga nwo rani. Ningaka. Saeya wi naeyar budi. Mi wim kima Biyan Inkam Komii Jisis Krais siirin wa sibgu inokninkini mi kimiir naingwo tibmiiya siiram wi kirieya nwowi. ⁹ Iikamim yipiki ti hiriinan dimin karamae nwowim simiir kwoinuin, yim sima ini iikamim yipiki kigimok karamae nwowiyim simiir hiriinan ywowim. Dimusi rani, sima nhwokwisaekim. Ti hiriinan iikamim sima bidi yaingwo owougiyim Adi Komii siya haiyoprimdiyumuigiya simiir dimin biyeyim sima tirim. Mi hiriinana sairsika tariinanin simiir kwoinim dimin whirki bi kimbukim.

¹⁰ Mi ti kariir nomiiyauim iya Adi Komii siya nikiuwa kimiirim mi siya bidi yimbimim kima siirgim, kima minan mirii dimin miyik tiramin. Mi hiriinan sairsika ti diminin wi kimiir whinkinsiis haiginuwi mhoiia Adi Komii siya wi kimiir nanmaiwarkainaei. Mi kima ti hiriinan dimin imiir tiri kima wi saika waiyayokiyoki siir om hir. ¹¹ Mi kima ti hiriinan dimin imiir wakaeyokna api mi Adi Komii siya anowin wi kimiiramar haiwaoki mi hiriinan sairsika kima wi omin Biyan Inkam

Komiiyin Jisis Krai siya kigriraowiyin yipiki biya naonamin kimiir whindiriraerarin mi kimiir nanmaiwarkainamin mi kima wi inokinok saikar nwoyokiyokikaeyami.

¹² Kima bidi yinokninkinim ti diminim kara boinkiyim mi kima sibgu dokworinu Adi Komii siir yayim simiir kirieni biya kima wakaeyim mi ha wakaeyokna apim mi inokinokin kara kimiir boinurwokaiyim swoki aingwokwonanaei ti dimin imiir. ¹³ Kara ha naingwowi yio siyu wadekin kara kimiira boinmauu yokiyokiyim ti dimin imiirin mi hiriinana sairsika kima wi simiirar nwoki aingwoyokiyokiyim iya kara ti omwaiya niki waiya tir. ¹⁴ Kara ina ninokninkinin, kariir iya naowana ini kingiin nwowa. Dimusi rani, biya Jisis Krai krimiir Biyan Inkam Komiiyin siya boinmauugin kariirin ti dimin imiirin. ¹⁵ Kara ta yokwowa minam winki mhoiya kara naonami mi inokinokin sima wi kimiir whinkinsiis haiginuwi ti dimin imiir naingwowoknakiyim. Iriig.

Krīma iikamim bidi kigim Jisis Krai siir dimin kirie kirieyim paenan niuyaeiyim

¹⁶ Krīma iikam krimiir yidwi wanwiyaemi niwii ningam simiir biri wakaeyokna apkim biya iya krīma boinmimauuim kimiir mi kimiir nanaakninkii haiginuwa Jisis Krai siir yipiki kirie komiigakin mi yipiki wi swoki iti. Ningaka, krimaki krimar kigin siir dimin kirie kirieyim paenan niuyaeiyim. ¹⁷ Mi Adi Komii siya siir inig iir hainanprapraski mi dimin komiiyin paenan niuyaeiyin siir ywowaiginugi. Dimusi rani, ti yai imiirsika. Krīma aposel kamim bidi

wakaekiyim iya siya hiniina boinkiyin, tiriginin yio kariir yinisim nwrkinwuruwan siya yipiki kara naingwokwonanaeyin ¹⁸ Krimaki krimar wakaekim ti yayim Adi Komii siir om hirinki nitim. Dimusi rani, krima saika nwokim mhuuin dimin whirki kimbu karamae nwowin Adi Komii siya nwowiyin hir.

¹⁹ Dimusi rani, diminim biya krimar kigim, krima ti yayim biya profet kamim sima boinmimauuim yipiki Adi Komii siir yayim sima nanaakninkii haiginuim simiiram naingwo tibmiikim. Mi kima ti ikamim ti yai imiir wakaeyokna api mi kima wi siyu miyik tiri. Ti Adi Komii siir yayim yipiki ti profet kamim sima boinmimauuim ini paeya maeyau nibwomambwowa saiir niuyaeiya mi nugakan nauunin siya whwoyayakwokiyim kimiir nisisimauuwim biyin ini kingiin nwowin sipi nimbinaidni. Mi ti hiriinan yayim biya profet kamim sima boinmimauuim yim ini paeya niyika krimiir niuya haiginuwiya ini saiir hiriinan ywowim Adi Komii siir yayim simiir sibgu wakaeyokna apim mi iya Jisis siya swoki itana wi saiirar namwoiuwi yipiki biyin nugak nimbinaidniyakwokiyin siir hiriinan. ²⁰ Mi biyin kima ti dimin taemin hiniinim pi kwaboini, simiir dinokninkin, wi nwirki siir kwoinara swoki ap rani, ti yayim krimiir kwoinau nwokaiyim yipiki biya profet kamim sima boinkiyim. Nningaka. ²¹ Tikina ya kaimwoka. Dimusi rani, biya profet kamim sima dimin taeminim simiir kwoinau nwokaiyim simiir biri wakaeyokna apkim mi ti yayim Yokwo Komiinau ha bi winkim. Adi

Komii kr̄m̄iir Wan̄in siir naeȳūn siya siyar kiyaiiḡin s̄imiir kwōn̄im m̄i s̄ima yaȳim Adi Komii siya bōnm̄imauuim s̄imiir̄in, ini s̄imiirar swoki bōnm̄imauuim. Iriig.

2

Dimin biyeyim yipiki niksisee kamim sima tiri ima

¹ Biya niksisee profet kamim Isrelan iikamim simaka nwokim. Ti iikam hiriinanim sima n̄iti m̄i w̄i kimaka n̄ini oni ti niksisee yai bibiyeyim s̄imiir hainaniyim m̄i ti hiriinan dim̄inim iikam n̄hirim yipiki Adi Komii kr̄m̄iir Wan̄in siir p̄uganiyim w̄i ti dim̄inim simar nonkwobumbun̄inkin haiḡin̄uwi m̄i s̄ima w̄i diḡum̄ii Biyan Inkam Komiiȳin Kraiss̄ yipiki biya s̄imiir nanmaiwarkainam naow̄in m̄i hiriinan sairsika w̄i kim̄im̄in tani siya s̄imiir̄in w̄i pae komiia sair n̄itnoudnankaiḡii. ² Mi iikam whiekakim w̄i s̄imiir siȳu biȳe imiirar wakaeyokna api m̄i w̄i ha bōni, yio dimin karamaeka h̄i h̄iriir̄ar danae. Mi m̄hoiia iki iikam n̄hirim w̄i yai biȳie Adi Komii siir yai imiir n̄igbumbuwi ti dim̄inim ti iikam bibiyeyim sima t̄rim̄ s̄imiirsika. ³ Sima niksisee niw̄iyyim s̄imiir̄in m̄inim naingwowi kim̄iir kwōn̄im imiir kiyayam m̄i um̄ir kim̄iir warauranki haiyam. Adi Komii siya iya ti hiriinan iikamim s̄imiir h̄idana sairamar nwok̄in. Adi Komiiȳin yipiki s̄imiir nonkwobumbun̄inkin̄an̄in siya nhwo wh̄in tani, siya ta iya s̄imiir nonkwobumbun̄inkin̄ana sairam̄in īi haruwa haruwa bīi nwonanaek̄in saeya n̄imbiniyam̄in.

⁴ Ti hiriinan dimininm biya Adi Komii siya tirim yim krimiirin hinina nisiimauugim Adi Komii siya wi whisarii nwonanae rani. Adi Komi siya paekwosimim yipiki dimin biyie tirim simiir bi swoki kigninkin okin saikar nwowamin. Nningaka. Siya simiirin maeyaua paekaka iikamim simiir nonkwobumbuninkinana saiir hiriir yikropki mi sima ini maeyaua paekaka saiir hirar niki okripkaiyim iya Adi Komii siya iikamim simiir hidana saiirim. ⁵ Biya Adi Komii siya iikam biyeyim simiir biri swoki kigninkin okin ti nuin omwai siir waiyam. Siya op komii whira yikropki mi iikam whiekakim ini siyar kaiyoprindipu aokaokiyim. Inkam nwirin Noa nikiuwiyin yipiki hinina boinmimauuwiyin iikam sima dimin taemin miyik imiiram daingwo tibmii, siya mi iikam iriyyar is iko sima simar ywonaowid, Adi Komii siya simiir biri nisomaokin. ⁶ Adi Komii siya om Sodom mi Gomora sowiir iikamim simiir bidi hidgiyim mi siya simiir om owiir hangimugi mi simiirin ini wara yunamim. Ti hiriinan dimininm yim aknainan iikamim simiir nisiimauugim yipiki mhoiyya omwai waiyai ti nu iir mi diminin yipiki dimin biyie simiir tiriyim simiir nimbiam. ⁷ Adi Komii siya Lot siir kigiraokin inkam miyik nwirin, yipiki siir kwoinin hauugihauuga whiyeyin hinanaeni siyu biyie sima tirin simiirsi mi iriipi hiriinan iikamim dimin miyikim sima tiranim sima digumii simiir mi haimriiyugin. ⁸ Inkam miyikin Lot siya iikam biyeyim simaka nwokin mi inokinokin siya dimin biyeyim sima tirim simiirar kigin mi dimin biyeyim sima mi boinim simiirar mi wakaekim mi siya

haugihauga siyiu biyie sima tirim simiiramar whiyiekin. ⁹ Mi ti dimin hiriinanim krimiirin hiniina nisiimauugim Adi Komii siya ina ninokninkin siyiuin iikam miyikim simiir nanmaiwarkainainin dimin kirie kirieyim hikak nwowiyim simiir hirankin. Mi siya wi iikam biyieyim simiir naingwo owou rani, simiir tirbumbuam mi simiir nonkwobumbuninkinam mi sima wi ta iya Adi Komii siya siir iikamim simiir hidana wi sairsi napiyok rani. Nningaka. ¹⁰ Mi Adi Komii siya ina sibgu inokninkin mi siya wi niksise profet iikamim yipiki hii nanaeni siyiu biyieyim simiir kwoinaw nwokaiyim simiir wakaeyokna apim mi siir kitinisiinam wi simiir naingwo owou rani, simiir nonkwobumbuninkinamin mi ti yipiki iikamim, Adi Komii siir kirie imiir wakaeyokna karamae nwowiyim mi ti niksise profetim simiir kwoinim kirie ywowim mi sima simiir kwoin imiirar napikim mi sima yai bibiyie paekwosim imiir boinsi bi nididikim. ¹¹ Adi Komii siir paekwosimim simiir kirieya komiiga ini iikam biyieyim simiir kirie aiir haiburim. Mi sima ti iikamim simiir bi boinhuriyiu boinikim Adi Komii siir whwonkam ida, simiir boinwokiyopnatkaigiyamin. Mi ti niksise profetim yim ini ti hiriinan siyiu iirar tirkrpkaiyim. ¹² Ti iikam hiriinanim yim ini hu habim kwoin miyik karamaeyim mi dimin taeminim sima tiram naingwowyim sima pi hindarar pridiraerari iikamki sim haiyim mi sima nitim. Mi ti iikam hiriinanim yim wi mhoyia tioidwomaii. Mi sima dimin taeminim sima ninokninkin karamae nwowiyim

simiirar priiboin priiboinikim. Mi mhoiyya Adi Komii siya wi simiir nonkwobumbuninkini, niimauan wraisuim iikamki sim nitkikikiniyim simiir hiriinan. ¹³ Mi simiirin dimin bibiyeyim sima tirim, wi simiirsi nonkwobumbuninkin haiginuwi. Sima ha naingwowi, kinaka naeiya ya dimin miyika mi simiir kwoinim simiir mhi imiirar mirninkinamar naingwowi, sima ini ta ma biyeya paowaigi piskimkopouim kimiir piu nonkwobumbuninkina ini saiir hiriinan ywowim mi sima simiir niksisee siyu imiiramar maingamaingaei simiir wakaeyokna apam. ¹⁴ Mi sima wig imiirar kaonanaeikim iripa piu simaka nwowim mi ti hiriinanin simiir kwoinin dig saeya nwowaiginu rani. Ningaka. Mi sima iikamim simiir kwoin imiir kiyaiigim yipiki simiir naingwo tibmiiya kirie nwo karamae nwowiyim mi ta hiriinan saiirsika sima dimin biyie asi tiri. Mi sima minam naingwoyokiyokii siyu umir digworaekwo haiyanin yipiki iikamim simiir yai imiir wakaeyim simiir hiramki haiyim. Mi mhoiyya Adi Komii siya wi ti hiriinan simiirsi nhinikriropki. ¹⁵ Sima digumii yaimwo imiir haimriyuwi mi dimin biyie imiir napi iikamim yipiki siyu miyik iir haiburgigim mi ha napwaeyamim nae hir simiir hiriinan ywowim. Sima dimin taeminim biya inkam nwirin Belam nikuwiyin Bioni yinisimin siya tirim simiir wakaeyokna apikim. Siya umirim naingwokin iikam sima hauuwim ti dimin biyeyim siya tirim simiirsi. ¹⁶ Mi siir donkiyin habwaowhaenan nwokin yai bi boinikin mi siya ini inkannanar yomboboinin mi siya yai kirie siir boin mi siir mi

ikidu dimin biyeyim siya naingwowim kwoinaw nwokaiyim simiir tirsi.

¹⁷ Iikamim ti kamim simiir hiriinanim yim bi whindiriraerarikim, yim aeyoweyim op karamaeyim, simsinakaigaeyamim ini simiir hiriinan ywowim. Sima ini naoni wau komii komiiyim koua hir nakiibimbiramiyim ini simiir hiriinan ywowim, iki sima yayim sibgu whinkinsiis haiginuwam bointidwokiiyim mi yim sima pi dimin whirminwhirmin swoki tir tani. Adi Komii siya ta maeyaua nibwomambwonana simiiram nimbinga. ¹⁸ Sima yai kirieyim yaimwo karamaeyim simiir wakaeyokna apikim, sima wi iikamim ti dimin biyeyim simiir kwoinaw nwokaiyim wi simiir kwoin imiir kiyai. Sima wi iikamim yipiki ti dimin biyie imiir haiburgigim iki iikam nhirim sima niki apkripkaiyim simiir kiyai. ¹⁹ Sima ti kam bibiyeyim hinina boinikim, yio dimin karamaeka iikamim simiir kwoin imiir naingwo apamin. Mi ta hiriinan saiirsika, sima ti hiriinan iikamim yim sima wi saiir nikwowaisii rani, sima ini simiiram priimiriyan iikam ywowim mi sima yaimwoni wakaeyokna apamin dig nwo rani. Dimin whirki inkam nwirni kwoin iir kwirii idwokai mi siya ti diminin siir kwoin kwirii idwokaiyin siir swoki tiri, yio yaeya dimin biyie tir tani mi siya wi ti dimin biyie iir swoki haiburgig rani. Ti dimin biyeyin siya bidi ywowin siir kouin mi yio siya ini whisarii mi priimiriyan inkam ywowin. ²⁰ Iikamim yipikim dimin biyie nuan iikamim sima tiriyim simiir haiburgig. Dimusi rani, sima ina ninokninkinim mi ina naingwo tibmiiyim

dimin miyikim Jisis siirim biya siya naowa krimiir dimin biye imiir haiyoprindiyumiiyim mi krimiir nanmaiwarkainaam. Mi sima dimin biyeyim simiir kwoinaw kwiri idwokaiyim ini simiirar swoki apnamim mi sima wi biyeyar nwowougusi dimin biye biya sima tirim wi simiir haiburgigi. ²¹ Yo ti hiriinanin wi wadie pi ywowin biya sima Adi Komii siir yai kibiyim biya inkamki boinmimauuim simiir wakae karamaekiswo mi sima bidi yasae irgrak wakaeyim mi simiir bidi wakaeyokna apim. Mi mhoiyya sima digumii ti yai imiir haimriiyugig mi ini siyiu biye imiir swoki apnamim. ²² Ti hiriinan diminim bidi yimbiamim yaimwowim biya profet kamim sima boinim simiir hiriinan, wain diminim siya whiekingikiyim pi simiirimar swoki ami simiir naeyimar huin inkamki hisokiyin yipa swoki ami maeyau bropa sair waripraparam. Ti yayim yim krimiir nisiimauwi ti ikam yipiki Adi Komii krimiir Wanin siir yai imiir wakaeyokna apim mi tariinanin sima digumii siir haimriiyugigin. Iriig.

3

Iikamim krima ina ninokninkinim Jisis Kraisiya wa swoki iti

¹ Ti kariir nomiiyauim kara naingwokwonanaeyim, takina ya yokwo kwisaka aeya kimiiram winhauugiya. Tiki yokwo imiirin kara kimiir kwoin imiir swoki hurworwokaigi. ² Kara kimiirin minam naingwowi yayim biya profet kam miyikim sima nanaakninkiiyim simiirim daingwo mi iripi hiriinan kima Biyan Inkam Komiiyin siir yayim yipikin

naonamin mi ha swoki insiin idwowin krimiir nanmaiwarkainam simiir timi aingwoki, ti yayim siya aposel kamim krimiir boinmimaugiyim yim kimiir boinmaugikim, ti diminim nim krima kimiir swoki kwaboimaugii. ³ Kima ina ninokninkinim tiki hiriinanim bii wi sima nibiyami iya kingiin nwowi Jisis Kraisi siya swoki itana. Iikam nhirim yipiki niewaiyuwiyim yim wi simbi niti mi sima wi yai bibiyeyim bwam karamaeyim wi simiir nini boini, simiir kwoinkar naingwo apiyim. ⁴ Mi sima niksiseae yai kimiir boini, biya Jisis siya hiniina boinkin siya wa swoki iti mi siya papi nwowin? Yayim biya krimiir yidwi wanwiyae ima boinim, bi swoki imbiyamkim ini hindara yasae okainainamim. Mi biya iya Adi Komii siya nonkwokwowin ti nu iir siya whuwiniunan mi tisi tariinana namwoniyim, dimin taeminim ini hiriyar nwokripkaiyim. Mi ti dimin taeminim sima boinim hiniin yim wi nibiyam tani, yim kaimwo rani. Adi Komii siya dimin kasakasa bi kisisana haiginkan. ⁵ Sima ti diminin siir ninokninkinam naingwo rani. Biya Adi Komii krimiir Wanin siya yayara boinkiyin mi nu ninomoro ina yimbiyamwo. Adi Komii siya nuin whii komii solwara saiir op imiir nonkwokwokin mi nu iirin nao siya whinkinsiisi mi yio tiriiginin iriipi hiriinan yio wi sipi mi kisinaei. ⁶ Mi mhoiia Adi Komii siya ha boinkiyin mi ha mi tirkiyin op airin mi opa ini nu iirar ywomairipugiyin mi dimin taeminim ti nu iir nwowim yim ina yaokaokiyim. ⁷ Mi ti nu ninomoro tariinan nwowo yo Adi Komii siir yai imar nonkworinukripkaii mi mhoiia iya

Biiyan Inkam Komiiyin siya swoki iti mi ninomora wi paeki niuwi mi wa digi mi nauun sisim mi nauun komii komiiyin wa niuginiski mi wi opnan nimbiam. ¹³ Adi Komii siya bidi boinin siya wi yaeya nu ninomor nonkwokwowi mi nim krima simiirim nwowi. Iikamim yipiki biya dimin biye tirim tapaiirin sima wi iikamim dimin whirki kimbu karamae nwowi. Irig.

¹⁴ Ti kariir nomiiyauim kara naingwokwonanaeyim, wim kima ti dimin hininim ti biya kwabongigim simiiram nwowi ninomor win mi nu win wi sowa nimbiamim mi kima miinan mirii dimin whirki niki kimbu karamae nwowim mi iriipa hiriinan dimin biye tirisi mi hiriinan saiirsika Adi Komii siya kimiirin wa naingwowi dimin whirki bi kimbugin mi kima wi saika nongwomamai aei. ¹⁵ Mi kima ta saiir daingwo krimiir Biiyan Inkam Komii siya wi nitsisau rani, iikam imiir hidamin, siya krimiirin hinina nisiimauwi siya pi boriisopi krimiir nonkwobumbuninkinamin mi siya minim naingwowi krimiir nanmaiwarkainaam. Siya ini krimiir nomiiyau miyikin Pol siir hiriinan ywowin, yipiki ti yai kibimi diminim Adi Komii siya hauwim siir simiir winkiyim kimiirim. ¹⁶ Iya Pol siya yokwowim ta iya Biiyan Inkam Komii siya swoki itina saiir winiyim siya dimin taeminim kara niki boinmimauwim simiirar swoki winkikim. Krima yai nhirim siir yokwonau nwokaiyim simiir sibgu inokninkin tani mi hiriinan saiirsika iikam biye nhirim yipiki ninokninkin karamaeyim sima pi ti Pol siir yayim pi simiir ninkpitki niksisaeyai nwowim

mî tî hîriinan siyîu kaimwowîn sima îkî profet kamîm yîpîkî îkî yai nhîrîm sima wînim Adi Komîiniyîm pî sima mî inkpîtkî yai biyîe mî inkîn owam mî hîriinan saiirsîka sima wî sima sima mî tîrbumbunaeî tî dimînîm sima tîrîm.

¹⁷ Mî tî kariir nomîiyauîm kara naingwokwonanaeyîm ta hîriinan saiirsîka kîma îna nînoknînkînim tî dimîn îmiirîn. Kîma, kîmasiyar mîntaraona mî tî hîriinan saiirsîka kîma wî dimîn biyîe tîr tani îkî iikamîm yîpîkî Adi Komîi siir wakaeyokna ap karamae nwowiyîm sima tîriyîm wî simîir tîr tami mî hîriinan saiirsîka kîma wî Adi Komîi krîmiir Wanîm siir yai kîbiyîm wî simîir haiburgîk rani. Sima wî kîmiir kînsiis haigîniîuwi yînin omaka nonkworînuwiyîm siir hîriinan. ¹⁸ Mî kîma Bîiyan Inkam Komîiyîm Jîsîs Kraîs siir naingwobumbua saiir sîbgu o, yîpîkî bîiya naowîm kîmiirîn siyar nîkî whîndîrîraerarîm mî nanmaiwarkainaam. Mî tariinanîm kîma siirîn kîpîîî nînoknînkîn tani mî mhîiîya kîma siirîn wa sîbgu înoknînkîni. Kara ha naingwowi siya îng komîigak dwo tariinan mî mhîiîya mhîiîya îriipa hîriinan. Iriig.

Yai Win Kibiya
The New Testament in the Sepik Iwam Language of
Papua New Guinea
Nupela Testamen long tokples Sepik Iwam long
Niugini

copyright © 1989 Wycliffe Bible Translators, Inc.

Language: Sepik Iwam (Iwam, Sepik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 21 Feb 2024 from source files dated 31 Aug 2023

5350dc83-93b2-5000-9c98-dcdb728ba84f